



UNIVERSITÄTS-
BIBLIOTHEK
PADERBORN

Universitätsbibliothek Paderborn

Martini Bonacinæ Vtrivsque Signatvræ Referendarii Compendium Omnium Operum de Theologia Morali, omnibusque conscientiæ nodis

Bonacina, Martino

Coloniæ Agrippinæ

Vnctionis extremæ subjectum, & quæ partes ungendæ.

urn:nbn:de:hbz:466:1-41152

unctionis, modo unusquisque ungetur independenter ab alio: non potest tamen unus ungere, & alter formam proferre. *ibid. n. 7. & 8.*

11. Alius Sacerdos debet perficere sacramentum inchoatum, si primus morte præoccupetur, indeque incipere, ubi alter finit. *ibid. num. 9.*

12. Sacerdos non incurrit irregularitatem, si ægrotus ex hac vita decedat, dum Sacerdos curat illum revolvi ad unctionem impendendam; hæc enim irregularitas non extat in jure expressa. *ibid. num. 10.*

Subiectum hujus Sacramenti, & quæ partes ungerentur.

13. Subiectum extremæ unctionis sunt soli fideles de vita periclitantes, qui ratione utantur, vel certe antea usi sint, hocque sacramentum recipere optaverint. Ita habetur in Concilio Florentino. *ibid. punct. 5. nu. 1.* Hinc.

14. Phreneticis qui ante phrenesim optaverunt hoc sacramentum, potest conferri, sicut & iis qui optaverunt, saltem interpretative, quales sunt qui christiane vixerunt. *ibid. n. 2. & 3.*

15. Non est conferendum iis qui non laborant infirmitate, licet in magno vitæ periculo versentur, ut patet ex dictis: quales sunt gerentes bellum, existentes in mari, damnati ad mortem à iudice, aut mulieres in partu existentes, qui non laborant infirmitate corporali. *ibid. n. 4.*

16. Hoc sacramentum conferri potest non solum adolescentibus post usum rationis ægrotantibus, verum etiam senibus, qui senectute conficiuntur absque alia infirmitate: nam senectus ipsa morbus est. Conferri potest præterea omnibus mortis propinquis ob morbum, ob pestem, ob tactum viperae, ob vulnus, & ob rabidum morsum: caveat tamen Sacerdos ne rabidi hominis sputum, seu salivam attingat; nam inficit attingentem. *ibid. n. 6.*

17. Non est expectandum extremum vitæ periculum, aut tempus quo infirmus sensu prorsus careat, aut quo omnis ejus desperata sit salus: sed hoc sacramentum administrandum est, si fieri potest, quando infirmus adhuc rationis usum gaudet, ut se magis ad fructum sacramenti recipiendum disponat, & sit capax alacritatis quæ conferri solet in hoc sacramenti. *ibid. n. 7.*

18. Si infirmus dum ungitur ex hac vita decedat, Parochus debet ab unctionibus desistere, cum non sit amplius viator; quod si dubitetur an sit mortuus, administrandum est sacramentum sub conditione, *si adhuc vivit. ib. n. 8 & 9.*

19. Omittens hoc sacramentum tantummodo ex negligentia, non peccat mortaliter: tenetur tamen Parochus illud conferre, cum illi incumbat ex officio consulere salutem suorum subditorum. *ibid. num. 11 & 12.*

20. Dandum est hoc sacramentum etiam illi qui nunquam actualiter peccavit, ex his verbis Jacob. 5. *Si in peccatis sit, dimittentur ei*: nam supponit posse conferri cuicumque infirmo. Quare conferri potest hoc sacramentum saltem sub conditione adulto, qui statim post susceptum Baptismum incidit in morbum lethalem. *ibid. num. 13. & 14.*

21. Non est peccatum mortale conferre sacramentum extremæ unctionis ante sacramentum pœnitentiæ, vel Eucharistiæ: quia infirmus potest per contritionem se ad illud disponere. *ibid. n. 15.*

22. De necessitate & essentia hujus sacramenti est ut ungantur quinque sensus corporis, oculi scilicet, aures, nares, os, & manus, repetita ad singulos forma: quod si quis careat uno corporis membro in quo viget aliquis sensus, unguenda est pars magis propinqua. Solæ autem hæ partes unguuntur, & non totum corpus, quia hoc sacramentum applicatur per modum medicinæ corporalis, quæ applicatur iis partibus à quibus morbus originem trahit. *ibid. num. 16.*

23. Unctio in pedibus vel renibus & umbilico adhiberi vel prætermitti potest juxta loci consuetudinem: semper tamen omittitur unctio in feminis in umbilico propter decentiam & honestatem. *ibid. n. 18.*

24. Sacerdotes non unguuntur in palma, quia semel fuerunt inuncti in susceptione ordinis sacerdotalis, sed in superiori versa parte manus. *ibid. n. 19.*

25. Non est necessario unguendum utrumque organum unius sensus, exempli gratia uterque oculus, vel utraque manus, &c. quia significatio istius sacramenti satis salvatur per unctionem unius organi: ex præcepti tamen servanda est locorum consuetudo, quæ vim habet legis. *ibid. 21.*

Effectus Extremæ Unctionis

26. Multiplices sunt hujus sacramenti effectus. Primo abster-